



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Epistolarvm Innocentii III. Romani Pontificis Libri Vndecim**

**Innozenz <III., Papst>**

**Parisiis, 1682**

Magistro Iohanni Svbdiacono & Notario nostro.

**urn:nbn:de:hbz:466:1-20006**



ad officium, non debeant eum in beneficio prævenire, nullum investias de beneficio Ecclesiæ Paduan. priusquam eidem sicut uni ex aliis integrum fuerit beneficium assignatum. Dilectis etiam filiis Archipresb. & Canonicis ejusdem Ecclesiæ per nostras litteras inhibemus ne aliquem ad beneficium prius admittant quam eidem Magistro, juxta quod præmissimus, fuerit satisfactum; decernentes irritum & inane siquid à te vel ipsis contra hoc fuerit attentatum. Quia verò non minus iidem Archipresb. & Canonici præter investituram tuam eidem G. præbendam conferendo peccarunt quam ipse recipiendo deliquit; ne unus puniri videatur pro omnibus, sed omnes puniantur in uno, ipsis per apostolica scripta præcipiendo mandamus ut ei præbendam, quæ tantum residentibus de communi confertur, sicut uni ex aliis de communibus proventibus, & manualia beneficia post suspensionem præsentium non differant assignare: ad quod eos, si (quod non credimus) parere noluerint, per venerabilem fratrem nostrum Gradensem Patriarcham, contradictione & appellatione cessante, ecclesiastica mandamus distractione compelli.

*Illis scriptum est super hoc, & Patriarchæ scriptum est super hoc.*

MAGISTRO IOHANNI SUBDIACONO  
& Notario nostro.

**C**ollato tibi quondam per manus nostras archidiaconatus officio, quem olim habuerat V. quondam Archidiaconus & Canonicus Paduanus, cum in Ecclesia Paduan. nulla tunc temporis diceretur vacare præbenda, donationi nostræ reservavimus proximè vacaturam, decernentes irritum & inane si quis de ea quicquam contra tenorem mandati apostolici præsumeret attentare. Cumque postmodum inter venerabilem fratrem nostrum Paduanum Episcopum & Magistrum G. Canonicum Ecclesiæ Paduan. super præbenda ejusdem Ecclesiæ propter hoc quæstio mota fuisset quòd idem G. præbendam præter investituram Episcopi de Paduanorum Canonicorum manibus accepisset, nos primò causam ipsam Ferrarien. Episcopo, secundò venerabili fratri nostro Episcopo Veronen. sanctæ Romanæ Ecclesiæ

Cardinali, ac tandem post sententiam à Ferrarien. prolatam, venerabilibus fratribus nostris Castellan. & Clugien. Episcopis commississe meminimus. Cumque postmodum ejusdem Episcopi procurator & dictus Magister G. propter hoc ad sedem apostolicam accessissent, causa ipsius coram dilecto filio P. tituli sanctæ Cæcilie Presbytero Cardinale, quem eis concessimus auditorem, diutius ventilata, & fideliter nobis per Cardinalem eundem, quæ proposita fuerant, hinc inde relatis, cassata quoque sententia ab eodem Episcopo Ferrarien. prolata, causam eandem dilectis filiis L. Priori & V. Canonico sanctæ Mariæ ad carceres sub certa forma commissimus terminandam; sic videlicet ut eodem G. reducto in statum in quo fuerat sententia non prolata, cum nobis ex ipsius confessione facta coram eodem Cardinale constaret quòd investitura præbendarum ad eundem Episcopum pertineret, & idem G. præter investituram ipsius prædictam præbendam de Canonicorum manibus accepisset, ipsum eadem sublato appellationis & contradictionis obstaculo spoliarent, & assignationem à Canonicis factam denuntiarent irritam & inanem; nisi forsan infra mensem post receptionem litterarum nostrarum constaret eidem Episcopum Paduanum post possessionem præbendæ ipsi G. à Canonicis assignatam, suum super assignatione à Canonicis facta eidem expressisse consensum. Præterea minus indecens attendentes quòd simplex Canonicus quam Archidiaconus & Canonicus præbenda careret, cum & idem G. ea se præbenda reddidisset indignum quam temere præsumpserat occupare, eidem iudicibus dedimus in mandatis ut non obstante mandato quòd à bonæ me. C. Papa prædecessore nostro pro eodem G. factum fuerat de beneficio vacaturo, eundem Episcopum commoverent ut eandem præbendam tibi vel nuntio tuo, non obstante appellatione vel contradictione cujuslibet, assignaret, quòd si non faceret, ipsi hoc nihilominus sublato appellationis obstaculo adimplerent. Delegati verò iudices juxta formam mandati apostolici procedentes, cum eidem G. restitutionis beneficium impendissent, sex Clericos & tres laicos productos ab eo ad testimonium admiserunt. Sed quia Episcopum assignationi sibi à Canonicis factæ suum expressisse

Vuu ij

Epist. 276.  
Sententiam pro  
ipso latam con-  
firmat.



consensum infra statutum terminum non probavit, licet idem G. ad sedem apostolicam appellasset, jam elapso termino, plures se asserens ad testimonium producturum, quia tamen in litteris nostris appellationis erat obstaculum partibus denegatum, ipsi contra eum se per contumaciam absentantem sententiam protulerunt, præbenda eum spoliante eadem, & assignationem à Canonicis factam decernentes irritam & inanem. Postmodum verò ad commonitionem eorum procuratorem tuum de eadem præbenda dictus Episcopus investivit, & licet sæpeditus G. ad nostram postmodum præsentiam accessisset, tamen contra prolatam sententiam, & investituram procuratori tuo factam, nihil penitus postulavit. Nos igitur sententiam ipsam, sicut ab eisdem iudicibus rationabiliter lata est, nec legitima appellatione suspensa, ratam habemus, & auctoritate apostolica confirmamus, & præsentis scripti patrocinio communimus. Nulli ergo &c.

ARCHIDIACONO  
& Capitulo Capuanis.

Epist. 277.  
Varia de electione & postulatione Prelatorum disse- rit.

Cap. Cùm nobis. De elect. & electi potestate.

CVM olim nobis de obitu bonæ memoriæ Archiepiscopi Capuani tam per vestras litteras quàm nuntios constitisset, volentes, prout officij nostri solitudo deposcit, in pastorem provideri celerius Ecclesiæ viduatæ, vobis dedimus de persona idonea faceretur, per quam in spiritualibus & temporalibus Capuana Ecclesia posset congruè gubernari. Vos autem mandatum nostrum suscipientes humiliter & devotè, statuto die in metropolitana Ecclesia convenistis, & cùm ad tractandum de faciendâ electione in Capitulo sederetis, & tu, fili Archidiacone, hymnum ad invocandam Spiritus sancti gratiam incepisses, dilectus filius M. Archidiaconus Theat. Canonicus Capuanus silentium indicens, sic ait: *Domine Papa ut faceremus canonicam electionem præcepit, & ego ne fiat, nisi canonica, interdico, & ad ipsum vocem appellationis emitto.* Cùmque à quibusdam vestrum quæsitum fuisset ab Archidiacono memorato quid intelligeret per canonicam electionem, respondit ut secundum decreta canonica nullus in Episcopum de aliena eligeretur Ecclesia, dum in propria posset idoneus inveniri. Et sic aliquantulo factò tumultu, cùm tu, fili Ar-

Celestinus in Decretis c. 18. cap. Nullus. Dist. 61.

chidiacone, hymnum iterum incepisses, ipse Archidiaconus Theatinus cum quibusdam complicitibus suis chorum exivit, & cepit in quodam angulo Ecclesiæ commorari, & vos hymnum in choro solenniter complevistis. Sed cùm post invocatam Spiritus sancti gratiam foret de electione tractandum, unum Presbyterum, & unum Diaconum, & alium Acolythum vicem gerentem Subdiaconi, qui etiam est Cancellarius Ecclesiæ Capuanæ, ut vota singulorum seriatim perquirerent, elegistis. Qui universonum perquirentes diligentius voluntates, vos omnes, qui ad eligendum in Capitulo remansistis, invenerunt in electione concordem, dilectum filium R. Subdiaconum & Capellanum nostrum filium dilecti filij nobilis viri P. Comitum Celanen. unanimiter nominantes. Demum verò prædictum Archidiaconum, & qui cum eo exierant, per quosdam de vestris admonere curastis ut ad electionem accederent faciendam. Sed cùm ipsi venire penitus recusassent, & diceret idem Archidiaconus quòd non ei feceratis tantum honoris & gratiæ quòd vobiscum vellet in electione faciendâ persistere, vos publicâ electione vestra cantastis *Te Deum laudamus*, & pulsari fecistis cum solennitate campanas, ut quod per vos factum fuerat, innotesceret civitati. Ad quarum sonitum cùm universus populus ad Ecclesiam advenissent, & audissent qualiter à vobis electio fuerat celebrata, factum vestrum communitè approbarunt, & quidam eorum, ut Archidiaconum & alios qui ab electione discordabant ad concordiam revocarent, multipliciter institerunt. Verùm ipse Archidiaconus, ut proponitur, se tunc ipsi electioni minimè consentire, sed in nostra præsentia suum assensum ipsi velle præstare respondit. quod etiam, sicut dicitur, sæpe ac sæpius in multorum præsentia replicavit. Tu verò, fili Archidiacone, cum multis de Canonicis Capuanis decretum electionis afferens eligentium subscriptionibus roboratum, ad nostram præsentiam accessisti, & cùm apud nos fuissetis aliquandiu commorati, tres Canonici Capuani pro parte adverfa post aliquot dies nostro se conspectui præsentarunt. Vobis igitur & ipsis in nostra & fratrum nostrorum præsentia constitutis, utrique partium præcepimus dicere veritatem, & quantum quidem erat in